



陪阿母坐高鐵

臺灣高鐵佇 2007 年正式通車進前，有一波廣告宣傳的活動。彼時陣，阮兩個後生當活骨，若拄著歇暍日，厝裡攏蹣袂牢。逐禮拜都愛安排去外口消放體力，若無，阮翁仔某會予這兩個猴囡仔齷甲擋袂牢。

有一改，我恁囡仔轉去庄跤看阿公、阿媽，電視新聞咧放送高鐵通車進前的優惠試坐活動，無論大細漢攏總半價，我就順繼招阮阿母同齊去看臺灣的高鐵是生做圓抑扁？

會記得，彼擺的優惠試坐活動愛先預約，當當我恰阮阿母欲撫拭試坐的日期，伊煞因為阿爸欲恰庄裡的人去遊覽，煩惱厝裡無人顧，伊就無愛恰阮去坐高鐵矣。

試坐了無佬久，阮閣恁囡仔轉去庄跤看阿公、阿媽。阮大漢後生足愛展的，伊展講高鐵是佬爾緊、座位是佬爾四序，連服務員的制服嘛足命的。看伊講甲喙角全泡，阮阿母聽甲耳仔覆覆，袂輸伊嘛咧享受彼種新奇的經驗全款。看著阿母好玄的表情，我就共伊講：「阿母，這改時間無拄好，後回我一定陪你去坐看覓，好無？」阿母笑笑仔應好。

後來幾若冬，我常在坐高鐵去各地出張。便若歇暍日轉去庄跤看阮父母，阿母攏會共我講：「你的人生誠有價值，不時坐高鐵去坦坦，閣是政府替你出錢的，足好空呢！」我若聽著「坦坦」就會足緊張共伊解說講：「彼是去做工課，毋是坦坦啦！」阮老母若像咧共我創治全款，伊講：「我知啦，出張兼坦坦，我袂共恁頂司投啦！」遮的對話，雖然是阮母仔囡的笑談，毋過我煞袂記得欲陪阿母去坐高鐵的約束矣！

2012 年熱人，阮阿母因為久年的跤骨痠疼，煞驗出是大腸癌第四期，歹物仔已經炭甲規身軀矣。雖然醫生判斷阿母的病情無樂觀，阮兄弟仔全款無欲放棄，恁伊南北二路去走揣名醫。

彼擺，是我頭一擺陪阿母坐高鐵，嘛是最後一擺。對嘉義到桃園，點捅鐘的時間，聽袂著阮母仔囡的講笑聲，干焦賸序大對囡兒序細毋甘的喘氣聲，閣有阮袂赴有孝阿母懺悔的心聲。

作者：黃文俊

☆詞彙學習☆

【消放】siau-tháu：抒解情緒、壓力等。

【齷】tsak：煩擾、打擾。

【當當】tng-tong：正當那個時後。

【撫拭】tshiâu-tshik：調度。安排配置。

【出張】tshut-tiunn：出差。到外地去辦公。

【投】tâu：告狀。

【炭】thuànn：蔓延、擴散。

【南北二路】

lâm-pak-jī-lōo/lâm-pak-lī-lōo：各地、大江南北。指從臺灣南部到北部的通稱，比喻全臺，沒有明確位置。

【捅】thóng：超過、多出來。